

**Virus Hati**

Di kala titik-titik hitam

Memaguti sanubari

Segala-galanya terasa kelam

Tidak bisa ditembusi cahaya mentari

Apabila hasad melanda jiwa

Mata merah menyala

Menggelegak api kecemburuan

Menyaksikan kebahagiaan insan-insan

Ketika hati dirundung rawan

Putus asa membelenggu kalbu

Sirna segala nikmat kurniaan di hadapan

Hanya rintihan dan keluhan kedengaran

Apabila riak dan keegoan bersatu

Musnah segala sifat ihsan

Bagaikan firaun

menganggap dirinya Tuhan

Sampai kapankah kalbu

terus-terusan dimamah mazmumah?

Ia perlu dirawat sebelum terlambat

Tiada jalan singkat, kecuali

Bertaubat.....berjihad.....beribadat.....

**Melayari Gelombang Percintaan**

Alam ini dirasakan indah

Pabila gemersik sayang mula menjengah

Membelai dan membisikkan

Irama ketenangan dan kerinduan

Namun perjanjian di dalam akad itu

Hanya mampu bertahan sedekad lamanya

Keghairahan cinta yang lalu

Sirna bagaikan fatamorgana

Kini yang kedengaran

Hanyalah lantunan nada

yang acapkali

Menghiris dan menggores perasaan

Ketika menelusuri terjahan persoalan

Di sebalik ikatan yang bergelora ini

Mata hati mula merembeskan pelbagai jawapan

Bibit-bibit awal percintaan

Dicemari gejolak nafsu

Tanpa taubat, hati sentiasa berjelaga

Di dalam remah perhubungan ini

Ibarat retak melampaui tara

Hubungan ini terus terumbang-ambing

Dipukul badai dek kecacamarbaan

Tanggung jawab dan amanah yang digalas

Serta keculasan dalam melaksanakan perintah Tuhan

Suatu ketika, gelombang pasti reda

Kembalilah mengemudi bahtera rumahtangga

Meneroka citra samudera cinta

Mewujudkan semula ketenangan,

kasih sayang dan belas ihsan

yang telah lama hilang.

**Pencuri Waktu**

Aku masih lagi duduk

termangu, berteleku

Jiwaku masih bersenandungkan

lagu sendu

Nostalgia silam

begitu utuh memagari hati

Aku terjerat

dalam seribu penyesalan

yang merenggut diri

Apabila aku berdiri

ritma kehidupan ini

membelenggu benak fikiran

terpacak sejuta kebimbangan

Kegusaran menikam rongga hati

Gelombang masa hadapan

bisa melemaskan

diri yang kerdil ini

Tiba-tiba lamunanku tersentak

oleh pantulan cahaya yang semarak

Menyedarkanku

untuk terus mara ke hadapan

Aku tidak boleh membiarkan

pencuri waktu bertelekan

menyelimuti perasaan

menyelubungi lubuk hati

Aku harus gagah dan tabah

menyusur arah impian

serta menyusun

langkah demi langkah

### Untaian Rintihan

Apabila ratapan dan raungan  
penduduk bumi tidak diendahkan  
Apabila rayuan dan belas ihsan  
tidak lagi berbekas pada mata hati

Kekejaman dan kezaliman  
pasti akan berterusan  
Bagaikan singa kebuluran  
yang melahap segala mangsa dihadapan

Kerakusan dan keserakahan  
Tidak mengenal arti perikemanusiaan  
Penindasan dan penjajahan  
Menenggelamkan cahaya ketenangan

Apakah dosa anak-anak  
yang belum mengenal arti kehidupan  
menjadi mangsa kebiadaban  
kuku besi-kuku besi yang berleluasa?

Mengapakah bumi milik Tuhan  
dipisah-pisahkan dan dijadikan cagaran?  
Bukankah kita semua akan dikembalikan  
dan disoal tentang segala penganiayaan  
yang dilakukan?

Bumi sudah lelah dan tidak betah

dengan tabiat penghuninya  
Hanya menunggu saat-saat kehancuran  
kecuali desiran kedamaian  
kembali menyantuni jiwa



**Harapan Bonda**

Seorang bonda yang tua renta

Saban waktu menghitung hari

Mengharap kunjungan yang tidak pasti

Untuk menzahirkan kerinduan yang mendalam

Menagih secebis kasih sayang

Bonda acapkali merenung jauh

Kekadang menelusuri pelbagai nostalgia

Mengenang rentetan peristiwa

Suka duka bersama anak-anak tercinta

Terbayang keletah mereka yang bersahaja

Ketika menyusuri segala pengorbanan

mengandungkan, melahirkan dan membesarkan anak-anak

dengan penuh belas dan kasih sayang

Bonda tertanya-tanya mengapa kini

Kesepian menjadi teman sejati

Di dalam esak tangisan yang penuh hiba

Hati bonda meronta-ronta

Diterjah persoalan-persoalan

Yang tiada jawapan pasti

Di mana permata-permata hati?

Kekecewaan sering kali

Memagut hati nurani bonda

Yang dahulu tabah menggagahi kehidupan

Tanpa suami di sisi

Tanpa mengharapkan simpati

Bonda terkesima kerana mereka tega

Meninggalkannya di sebuah teratak usang

Bersama penghuni-penghuni

Yang senasib dengannya

Tiba-tiba genangan air mata bonda

Mula merembes lesu

Bonda terkilan dengan kata-kata semu mereka

yang berjanji untuk membelanya  
sehingga ke detik nafas yang terakhir  
Walaupun mereka memungkiri,  
bonda tetap menyimpan segunung harapan  
untuk mereka kembali menjemputnya

Di dalam dakapan pengharapan  
Bonda menadahkan tangan  
semoga anak-anaknya kembali kepadanya  
sebelum dia sendiri berpulang  
menghadap keharibaan Tuhan  
dengan hati yang rawan.